



Tir Yimyim

www.tiriyimim.in

Regd. No. RNI. NAGAAO/2004/13113. Postal-NE/RN-717.

e-mail : tiriyimim@gmail.com

TAPAK 3 Yangia anidakangma : f Tir Yimyim

Instagram tiriyimim@aolima

YouTube tir yimyim

TAPAK 7



BJP-i Karnataka nung nüburttem telemtetba agizüker: JP Nadda

Imran Khan-i Pakistan tesem ajungalen longkak aittsü ayongzük

VOL. XX NO. 212 (ADOK 212) DIMAPUR TENTONÜ (MONDAY)

MONUPII (MAY) 15, 2023

₹ 5.00

Centre-i Manipur CM Biren Singh jaok

New Delhi, May 14, 2023 Home Minister Amit Shah nati (Agencies): Manipur nung mepetmesü tulu adoka raratepba sülen Centre sorkari chief minister N Biren Singh jaok.

Manipur chief minister Biren Singh den cabinet züngsem kar Deobarnü New Delhi tongogo.

Manipur CM Biren-i Prime Minister Narendra Modi aser Union Home Minister Amit Shah na den ajuruteptsü. Idangji pai Manipur tensa indang osang metetdaksütsü.

Biren-isa telungpur teloktem den Suspension of Operation (SoO) indang onük lemsateptsü ta osang angazüker.

Manipur nung Chin-Kuki-Mizo-Zomi nunger MLA 10-i state balaka meshia takhangba agütsüba sülen CM Biren-i Delhi semdang. Tawa Meitei aser lisopurtem tsüingda mepetmesü adokba sülen MLA 10-i state balaka razüka aotsü takhangba agütsüogoo.

MLA 10 rongnung BJP nungi 7, Kuki People's Alliance (KPA) nungi 2 aser Independent ka lir. KPA MLA ana aser MLA tem ya BJP-i aniba NDA den yaritepertem lir.

Minister Th Biswajit, Minister Th Basanta Kumar, Minister Y Khemchand aser Minister Govindas Konthoujam nungeri Manipur CM Biren Singh meina aru.

Osang angazükba agi Manipur BJP president A Sharda Devi-ia New Delhi tonga arua lir.

"BJP-i Karnataka election nung tamakok nguogo anungji PM Narendra Modi aser Union

UGC-i website tasen 2 lapoker

New Delhi, May 14, 2023 (Agencies): National Education Policy 2020 mapa kuma inyaksü aser India nung higher education tajungba akümtsü atema University Grants Commission (UGC)-i maparen tasen asem tenzükogoo.

UGC-i UTAH (Undertaking Transformative Strategies and Actions in Higher Education) Portal aser Professor of Practice (PoP) Portal lapokogoo.

UGC website yanglushiba ajanga kaketshirtem, tesayurtem aser rejutemi osangtüsang zübazüba metettsü akok.

UTSAH Portal ajanga National Education Policy 2020 mapa tenzükba aser linük nung higher educational institutions (HEIs) nung iba mapa inyakba nung yariteptsü. Iba portal ajanga higher education nung UGC-i mapa inyakbatem osang lemsateptsü.

Home Minister Amit Shah nati Manipur nung temulung agütsütsüla" ta Congress-i metetdaksü.

PM Modi aser Amit Shah nati "Raj Dharma" sülen anidaksüla aser Manipur nung yimjung bener arutsü atema temulung agütsütsüla ta Northeast Congress Coordination Committee (NECCC)-i ashi.

Manipur nung tensa mejungi akümba atema Prime Minister Narendra Modi-i kechiba ola madoker ta taoba mapang Congress-i asüingdanga liasü.

"Prime Minister-i Manipur atema Twitter nunga osang kecha melemsatop. India sorkar lir mali?" ta Congress lennir Bhakta Charan Das-i May 11, 2023 nü asüingdang.

Manipur nung May 3 nungi mepetmesü adoka lendong balala ataloka liasü aser tang ang tensa tera süngjema aoer.

Meitei nungeri Scheduled Tribe (ST) jenjang meshiba anema May 3 nü hill district 10 nung 'Tribal Solidarity March' ayonga agiba sülen mepetmesü adoka liasü.

Iba onük nung Manipur sorkari reserve forest land nungi Kuki yimdaklirtem meindokba bendenloka nübortem tsüingda mepetmesü adoka raratep.

Manipur nütsüing yongsük nung Meitei nunger 53% lir aser parnok teimba Imphal Valley nung alir. Külen Naga aser Kuki nunger lisopurtem nütsüing yongsük 40% lir aser parnok ya hill district tem nung alir.

UTSAH Portal-isa digital learning, industry-institute collaboration, academic research, aser internationalization wadangtem nung tenük yoktsü aser osang metetpelatsü.

HEIs-i parnok indang AISHE code amshia UTAH Portal nung log in asütsü aser maparen balala indang osang lemsateptsü. UGC-i HEIs ajanga agütsüba osang nung ajemdaker monthly reports agütsütsü aser iba ya policy yangluba aser tarutsü atema asalentong yangluba nung amshitsü.

National Education Policy 2020 den külemi UGC-i Professor of Practice (PoP) Portal lapokogoo. Iba portal ajanga rejutemi professional experts nungdakang teyari angutsü.

PoP Portal ajanga mongintem register sütettsü aser rejutemia PoPs indang advertisements agütsütettsü.

Congress tir nem Karnataka CM shimtsü tashi agütsür



Siddaramaiah & DK Shivakumar

Bengaluru, May 14, 2023 (Agencies): Deobarnü Karnataka Congress Legislature Party (CLP) senden nung chief minister shimtsü atema Congress president nem tashi agütsütsü bangjemtem.

Senden nungsa taruba Brihostibarnü Karnataka Chief Minister aser cabinet züngsemtemi tezüingzüktep agütsü lemtet.

Iba sentong nung Gandhi'er kibong aser Congress tir Mallikarjun Kharge nunger adentsü.

Congress-i kasa tangatetba

aliba telok ajak dangi Karnataka sorkar tezüingzüktep agiba sentong nung adentsü jaokogoo.

Congress-i Deobarnü Bengaluru nung aliba five-star hotel ka nung MLA ajak jaoka senden ka amen.

Iba CLP senden nung chief minister shimtsü atema Congress president nem tashi agütsütsü lemtet.

Senden agiba kima nung Shivakumar aser Siddaramaiah pusemertemi yimyim ayima toktepa liasü. Telok anaprongi parnok lennir nem Karnataka CM inyadaksünüa yimyim

ayima liasü.

Tanü Karnataka CLP senden nung Congress General Secretary tem- Sushil Kumar Shinde, Deepak Babaria aser Jitendra Singh Alwar nungeri observers ama aden.

South India nung BJP sorkar ketdangsuba state ji Karnataka dang liasü saka Congress-i yashi menden 135 nguteta BJP sorkar atsüingdokogoo.

Taküm election nung BJP-i menden 66 nung dang takok angu. 2018 Karnataka election nung parnok menden 104 nguteta liasü.

2023 election nung BJP-i Scheduled Tribes (ST) category nung menden ka nung dang takok mengutet. Karnataka nung reserved constituencies 51 lir aser iba nungi Scheduled Castes (SC) candidates atema 36 aser ST candidates atema 15 lir.

Taküm assembly election nung Congress-i menden 135 nung takok angu aser iba ya 2018 election dang nungi menden 55 talila anguba lir.

India nung nisung 1,272 dak Covid putet

New Delhi, May 14, 2023 (Agencies): India nung tesüiba ghonda 24 tsüingda nisung 1,272 dak COVID-19 putet ta Ministry of Health and Family Welfare-i metetdaksü.

Tang linük nung nisung 15,515 anepaludar ta parnokisa ashi.

Tesüiba ghonda 24 tsüingda nisung 2,252 taneptsü nguogo aser parnok züingsema Covid-19

nungi taneptsü angur 4,44,33,389 lir, ta Ministry-isa ashi.

Kasa ghonda 24 tsüingda Covid vaccine indang dose 1,699 agütsüogoo. Tang tashi nung Covid vaccine indang dose crore 220.66 agütsüogoo.

Covid wara tenzükter 92.86 crore tests süogoo aser tesüiba ghonda 24 tsüingda sample 1,24,628 tendanga liasü, ta

Ministry-isa metetdaksü.

"World Health Organisation (WHO)-i tawa tu COVID-19 ya global health emergency masü kümogoo ta metetdaksüogoo. Ajüsüaka wara menatepba aser ano variant tasen putetba ajak jungjunga repringtsüla" ta Tata Institute for Genetics and Society (TIGS) Director Dr Rakesh Mishra-i ashi.

Manipur tensa mesüingjemeteter; Sepaitem amak

Imphal, May 14, 2023 (Agencies): Manipur nung ketdangsurtemi tensa azüoktsü merangaka tesem kar nung mepetmesü maneni lir.

"Yashi nungi tesem kar nung ozüing alema mapa inyaksü tenzükogoo" ta Manipur sorkar atema Adviser (security) Kuldeip Singh-i ashi.

May 13 nü mejangjatetba nisung kari Churachandpur district kübok Lailampat nung Assam Rifles aser Army dak injang khaloktsü. Iba lendong nung jawan ana yiru aser tena mozü kidang anepaludar.

Ano, yasüing Imphal valley nung tasümgang ka angu aser Bishnupur district o Churachandpur district anasa Torbung Bangla nung ki 10 tashi rongdoktsü.

Iba tatalokba sülen BSF company ana tashi tesem tonga yok aser tanep ano BSF company

3 tashi yokogoo ta Adviser (security) Kuldeip-i ashi.

Suspension of Operation (SoO) indang designated camp nung onoki inspection südar. Parnok tesep nung SoO züingsem aika akümer ta osang lir saka iba kuli ano mengutet lir ta paisa ashi. Deobarnü Kangpokpi district nung mejangja nisung kari tipper trucks 5 noktang. Iba nungi ana rongdoktsü saka gari asem Imphal tongogoo, ta Kuldeip-i metetdaksü.

CRPF assistant commandant Daneil Hmar-i Imphal nung alir ka dak tim mesüi inyakba ken o benok aser iba atema bushisüingdang ka tenzükogoo, ta paisa shisem.

Tengnoupal, Chandel, Kangpokpi, Imphal West, Imphal East, Thoubal, Bishnupur, Kakching, Jiribam, Churachandpur aser Pherzawl district tem nung curfew ano

magien lir. Ajüsüaka Tamenglong, Senapati, Ukhrul, Kamjong aser Noney district tem nungbo curfew agienogoo, ta paisa metetdaksü.

Manipur nung mepetmesü adokba sülen nisung 73 tashi taküm samaogoo. Tasürtemji Imphal West district nung 25, Imphal East district nung 13, Churachandpur district nung 18, Bishnupur district nung 8, Kangpokpi nung 5, Tengnoupal nung 2 aser Thoubal district nung 2 liasü.

Ano, lendong balala nung nisung 243 tashi yirua liasü. Tatalokba balala atema FIRs 385 benokogoo aser 456 arms ngutetogoo.

Manipur nung nisung 26,358 tashi relief camps 178 nung jenoka lir. State tanga nung arur nisung 3124 tashi airport tashi meinoktsü ta Adviser (security) Kuldeip Singh-i ashi.

Kohima Longkong Senso Telungjem kum 50 jungogo



Kohima Longkong Senso Telungjem kum 50 ajungba Hon Jubilee benjongmung sentong May 13, 2023 nü St. Mary's School, Lerie colony Kohima nung alidang tongti tejaoker Advisor, Water Resources, Tongpang Ozüküm-i Kohima Longkong Senso Telungjem indang otsü kaket sayatsüba mapang tangokba noksa nung angur.

Kohima, Monupii/May 14 (TYO): Kohima Longkong Senso Telungjem tenzüker kum 50 ajungba Hon Jubilee benjongmung sentong ka "Putusen nung arantet senso" ta asuba omen nung ajemdaker May 13, 2023 anepdang 10:00 ako nungi tenzüka St. Mary's School, Lerie colony Kohima nung agia liasü.

Iba sentong nung tongti tejaoker Advisor, Water Resources, Tongpang Ozüküm-i ashiba agi, Aoertem tang pei tetsü oshi ama-a anidaker, shibai metet kum ishika lir dangar kin oshiji Naga nunger 'official language' kuma aotsü ana nung lir.

Asenok tang lanur koba 'first generation' nung lir, asenok pei tetsü oshi mejembitet nung asen chiri koda jembitsü, ta pai ashi.

Iba sentong nung jembidang tongti tejaokeri tanü pei tetsü taso lima toktsür Kohima aser

Dimapur ama yimitem agi pei lima kümer alirtem tsüraburtemi pei tetsü oshi, Ao oshi nung temolung agütsütsü ajungshia liasü.

Lanurtem tang mekümdangra mapang ka arutsü aser idangji Ao oshiji sen agi alia angazütsü merangtsü saka iba mapang nungji tejangraba melira mangazütsü aser oshi samaa aotsü. Anungji asenok lanurtem aser bendanglen alirtemi pei tetsü oshi wazüka ayutsü kanga tongtipang lir, ta paisa ashi.

Maneni pai sentepa aliba nüburtem dang pei tetsü taso yimkong mamadoki mapa ajak nung shisa tajung agüja yariteptsü ayongzük.

Iba sentong nung "Putusen nung arantet senso" onük nung ajemdaker o jembir Deputy Director, RD (Retd) Marsoba Ao liasü.

Iba sentong nung menden

Kohima Longkong Senso Telungjem ketdangpurtem liasü, Yashimongla, Convener, Kohima Longkong Tamang Telungjem ajanga Lai zünga sarasademer sentong tenzüker, KLST tir Imliwapang Jamir-i tayongzükba o jembir, N. Temjen Jamir-i asür bilemetba shilem agi aser Imnajungla Longkumer ajanga temeja ken ka tena liasü.

Sentong nung Langpangkong Senso Telungjem Kohima tir, Longkong Senso Mungdang tir, Mokochung Town Longkong Senso Telungjem tir aser Dimapur Longkong Senso Telungjem tir temi jubilee salem o jembia liasü.

Maneni Longkong Village Council chairman, M. LEpden Jamir-i tayongzükba o jembir aser KLST Golden Jubilee Planning Committee convener, S. Senka Jamir-i melepzüng o jembia liasü.



Ao Kaketshir Telongjem Changtongya Town purtem meyong ki (Commercial building) ka May 13, 2023 anogo nung Changtongya Town Baptist Arogo nung sannüker Rev. Temshi-i sarasadema semzüksüogö. Iba ki ya tangbo ground floor nung room asem dang lir saka tarutsü nungbo kakeshirtem asoshi nungdakba takdangtem süloka atutsü sentong lir ta kaketshir lenirtemi metetdaksüogö. Iba ki semzükba sentong nung adenertem külemi iba kima agiba noksa ka yangi angur.



Tribal Old Age Home cum Day Care Centre (TOAHDC) nung May 14, 2023 nü Mother's Day sentong ka "Godly Mothers" omen nung ajemdaker agia liasü. Iba sentong nung o jembir Kilang Longkumer, Pastor, Nukmen Baptist Arogo liasü, Ebenezer Orphanage Home aser Meren Imsong nungeri skit aser ken ajanga shilem agi aser Imlitongzuk Amri (Director, TOAHDC) ajanga tetsütem ayongzükba o jembir aser sempet aser sarasadem agi moaja liasü. Iba sentong nung tetsütem rongnungi tantsütüla ya arishi kum 93 tain Imsüenla liasü.

PILAR KÜM KA SÜR



Rev. P. Anung

May 8, 1944 - May 15, 2022.

NA ONOK MULUNGJANG NUNG TETI LIR,
PILAAKA, KODANGA AMADOKTSÜ MAKOK,
NA MENUNGRASETA SARASADEMA
AMUNGER.

- Temeim Kinüngertem.



Hope Channel Dimapur ajanga DBIDL Hall, Don Bosco Hr. Secondary School, Dimapur nung May 14, 2023 nü Mother's Day sentong ayongzükba agidang tetsü ka nem tetushi agütsüba noksa nung angur. Iba sentong nung lenla balala nungi tetsütem nem konang tetushi agüja liasü.

CNWA ajanga mezüngbuba Foundation Day mungogo

Dimapur, Monupii/May 14 (TYO): Central Nagaland Women Association (CNWA) nem tenütsang agütsü aser CNTC tashi aittsü asoshi pur mezüngbuba Foundation CNWA ya noktang tajung ka lir ta ashi. Day nüngtem nung sarasadem sentong ka May 14, 2023 nü CNWA Office nung agia liasü.

Iba sentong nung menden CNWA tongti zülur Zujano Patton liasü, kong CNTC tir T. Lanu Imchen aser Aienla Yapang ajanga ketdangpurtema dena liasü.

Iba sentong nung o tatsüka Onen Walling ajanga sentong jembidang T. Lanu Imchen-i iba tembanga sarasadem.

METONGSHITSÜR

Tir Yimyim osangkaket Vol. XX No. 211 (Adok 211) May 14, 2023 (Amungnü) adokba tapak ana (Page 2) nung "Ao Kaketshir Telungjem Dimapur Inty mungdang mungogo" osang tatemlen 2023-2025 kümsük atema AKTD ketdangpurtem tenüng yamai metongshitsür: tir Imnatemsu Pongen (Mangmetong), tatong tir Limanungdang Longchar (Mongsenyimti), tongti zülur Hangi Jamir (Mopungchuket) aser repsem zülur Imnameren Walling (Khar). Aibelenba atema saras.



May 14, 2023 nü New Delhi nung Delhi Chief Minister, Arvind Kejriwal aser AAP lenir Sanjay Singh na den Shiv Sena (Uddhav Thackeray telok) nungi lenirtem- Aaditya Thackeray aser Priyanka Chaturvedi nung senden amenba sülen tangokba noksa nung angur.

Linük nung temperature 2-3 degrees celsius tali atutsü: IMD

New Delhi, May 14 (Agencies): Taruba anogo pongu tsüingda India linük tesem aika nung maximum temperatures 2-4 degrees Celsius agi tali atutsü, ta IMD-i metetdaksü.

Cyclone 'Mocha' ajanga northeast nung aliba state aika nung tzunglu sashia arutsü, ta India Meteorological Department (IMD)-isa metetdaksü.

Rajasthan, Madhya Pradesh

asur Vidarbha region nung kanga tatsük akümtsü aser item tesem nung maximum temperature ji normal dang nungi 5-6 degrees agi teimba asütsü.

Rajasthan anüolen kanga tatsük akümtsü aser maximum temperature ji 45 degrees Celsius adena atutsüa akok, ta IMD-isa metetdaksü.

Met Department-ia India anüdoklen, talisa Gangtic West

Bengal nung May 15-16 anogotem nung kanga tatsük asütsü aser May 15 nungi May 17 tashi Andhra Pradesh aser Odisha tzüyinkümlen kanga tatsük asütsü, ta metetdaksüogo.

'Mocha' ta ajaba cyclone yipru ajanga May 15 nungi May 17 tashi Nagaland, Manipur, Mizoram aser Tripura tesem aika nung tzunglu sashia arutsü, ta IMD-i metetdaksü.

BJP-i Karnataka nung nüburtem telemetba agizüker: JP Nadda

New Delhi, Monupii/May 14 (Agencies): Karnataka assembly election nung BJP-i tamakok anguba sülen BJP National Tir JP Nadda-i, party-i Karnataka nung nüburtem telemetba ajemalua agizüker aser party-i opposition shilem agia maneni nüburtem atema ola adoktsü, ta metetdaksü.

Küm 10 sülen Karnataka nung Congress sorkar aruogo. Assembly menden 224 aliba state nung Congress-i menden 136 nung takok ngua liasü.

JP Nadda-i twitter ajanga Karnataka Assembly election nung party nem vote agütsürtem aser BJP Karnataka unit nung inyakertem dang pelaba lemsatop.

"BJP-i Karnataka nunger telemetbaji ajemalua agizüker. @BJP4Karnataka nung inyakertemi kanga meranga inyakba aser onok mangdang nung tamang akar nüburtem dang pelaba lemsateper," ta pai metetdaksü.

"Ato kilonser, Narendra

Modi lenisüba kübok BJP-i maneni nüburtem atema inyaksü aser

opposition shilem tajung agia nüburtem atema maneni ola adoktsü," ta pai metetdaksü.

Ato kilonser, Modi-ia twitter ajanga, "Karnataka assembly election nung takok anguba atema Congress Party nem tenüngsang agütsür. Nüburtem taginüba ataloktsütsü atema ni parnok atema tajungtiba bilemstür," ta lemsatop.

EIPMF senden alidang Jaishankar-i Foreign Minister tem aika ajuru

Stockholm, May 14 (Agencies): Sweden nung EU Indo-Pacific Ministerial Forum (EIPMF) senden aliba mapang India External affairs minister, S Jaishankar-i France, Austria, Belgium, Bulgaria, Cyprus, Latvia, Lithuania aser Romania nungi Foreign Minister tem den jurila senden amen.

Pai Foreign Minister tem aika den Indo-Pacific aser Ukraine rara atema jembi.

EIPMF senden nung adentsü atema Jaishankar Sweden-i oa lir. EIPMF senden

mapang pai linük balala nungi Foreign Minister tem den senden amen.

Testülen pai twitter ajanga, "France Foreign Minister Catherine Colonna ajuruba atema pelar. Ato kilonser Narendra Modi-i Bastille Day anogomong nung semdangba sentong takok angutsü atema lai lemsatop. La den Indo-Pacific aser G20 atema jembi," ta metetdaksü.

Jaishankar-isa Austria Foreign Minister Alexander Schallenberg ajuru aser tenati

Mobility & Migration tezüngzüktep agi.

Jaishankar-isa Belgium Foreign Minister, Hadja Lahbib, Bulgarian Foreign Minister Ivan Kondov,

Latvia Foreign Minister Edgars Rinkevics aser Romania Foreign Minister Bogdan Aurescu nung den-a jurila senden amen.

Hokolbarnü Bangladesh nung Jaishankar-i 6buba Indian Ocean Conference nung jembiba sülen yang nungjagi Sweden-i oa liasü.

Praveen Sood CBI Director shimogo

New Delhi, May 14 (Agencies): 1986 batch IPS officer aser tang Karnataka DGP teinyakdak, Praveen Sood küm ana atema CBI director shimogo.

Sood-i CBI Director, Subodh Jaiswal melenzüksü kechiyong pa kümsük May 25 nü tembangtsü.

High power committee senden nung CBI Director menden atema Sood shima liasü. Iba committee nung züngsemtemji Ato kilonser Narendra Modi, Chief Justice of India DY Chandrachud aser Opposition nung Lenir, Adhir Ranjan Chowdhury nung lir.

Senden nungji Congress lenir Adhir Ranjan Chowdhury-ibo CBI Director menden atema Praveen Sood tenüng benokbaji ashishia liasü, ta osang ngazüker.

Praveen Sood ya IIT Delhi nungi graduate lir. 1986 küm pa Indian Police Service (IPS) nung join asü. Pa 1989 küm nungi Mysore nung Assistant Superintendent of Police inyak, iba sülen Bellary aser Raichur nung Superintendent of Police inyak. Tesüsa pa Bengaluru nung Deputy Commissioner of Police (DCP) inyaka liasü.

1999 küm nungi Praveen

Sood-i Mauritius nunga küm asem inyakogo.

Tesülen pa Indian Institute of Management, Bangalore nung Public Policy & Management aser Maxwell School of Governance, Syracuse University, New York nung azüng.

Pa 2004 küm nungi 2007 küm tashi Mysore nung Commissioner of Police inyak aser iba mapang nungji pai kiralongratem network anema kanga meranga inyak. Iba sülen 2011 küm tashi pa Bengaluru traffic police nung additional police commissioner inyak.

1996 küm pa nem Chief Minister's Gold Medal for Excellence in Service agütsü, 2002 küm Police Medal for Meritorious Service agütsü aser 2011 küm President's Police Medal for Distinguished Service agüja liasü.

Taküm March ita nung Karnataka Congress Tir, DK Shivakumar-i, par party-i sorkar kümra pai DGP Praveen Sood anema inyaksü, ta jembia liasü. Shivakumar-i, state nung DGP Sood-i BJP pusema inyaker aser pai Congress lenirtem anema ken o 25 shi benoka lir, ta metetdakja liasü.



May 14, 2023 nü Stockholm, Sweden nung EU Indo-Pacific Ministerial Forum alidang India External Affairs Minister, S. Jaishankar aser Bulgaria Foreign Minister, Ivan Kondov na jurila senden ka amenba sülen tangokba noksa nung angur.

Karnataka assembly election osang ajanga teimla sayur: Mehbooba

New Delhi, May 14 (Agencies): People's Democratic Party (PDP) Tir aser taoba mapang Jammu & Kashmir nung chief minister inyakla, Mehbooba Mufti-i, Karnataka nung alirtemi BJP indang telemsa adokdaksüba agenda tamakok ngudaksüba ajanga linük nüburtem nem teimla ka agütsüogo, ta metetdaksü.

Laisa, BJP-i level ajak nung telemsa adokdaksütsü meranger aser Lord Hanuman tenüng-a tetshir, ta ashi. Lai, Ato kilonser Narendra Modi-ia tamangba yimsü dak sendakba onüktem benoktsü merang, ajisüaka amajok dang liasü, kechiyong nüburtemi yimsü nung ajemdaker tesempa prokba politics tamakok ngudaksür terenlok atema vote agütsü, ta ashi.

Mehbooba Mufti-i, BJP-i tamakok anguba aser Congress-i takok angubaji

tang ama mapang ka nung kanga tongtibang, kechiyong sangküm Lok Sabha election agütsü lir, ta ashi.

Laisa, Karnataka nung dang masü saka linük nung tanüngba nüburtemia terenlok aser adianu temeimtep atema vote agütsütsü, ta ashi.

Pakistan nung taoba mapang Ato kilonser, Imran Khan apuba sülen longkak aita tensa raksaba dak sendakba nung lai, kidanger linük nung tang tensa ya shisabulutsüsa lir, ta ashi.

Laisa, Pakistan nung Supreme Court aser media-i kecha mebendangi pei teinyaksü shilem junga inyakba ajanga linük nung tensa junga akümtsü teimla agütsür, ta ashi.

Karnataka assembly election nung takok anguba sülen Jammu & Kashmir nunga Congress party office ajak nung party nung inyakertem benjungtepa liasü.



May 14, 2023 nü NGMA, New Delhi nung Ato kilonser, Narendra Modi-i 'Jana Shakti' exhibition semdangba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, MONUPII (MAY) 15, 2023

BJP-i kokdaksüba Congress takok

Tanü India nung Indian National Congress telok ya akhidang Mahatma Gandhi aser Subhas Chandra Bose nungertemi aniba Congress amato masü mesüra Nehru, Indira aser Rajiv nungertemi aniba Congress telok amatoa masü. Atangji, linük meimba agi Sonia aser Rahul Gandhi nati anir taküm ajak bendanga agüja Congress yimli ajungkettsü asoshi inyaker saka tebou, tetsü aser tebu nung amato masü, Rahul Gandhi dak nübertem puatsüsa sempet ka mali amai repringteter, anungji alima aso 21 buba ya putubo par putu ser nung yimten tashi tanaben lepa bener marutet kangshiba asenoki angur. Ashiko, ibaji Tsüngremer mapang asütsüa akok, kechiyong alima nung memelenshiba kecha maka ajak melenshir. Aji oda, yimten yimlia melenshir aser item ajakji Tsüngrem ket nung dang lir. Iba ama mapang ka nung tang Karnataka nung Congress teloki government ayongayonga akümtsüsa yimsü tesüdak BJP telok madak takok tulu angubaji, ashiko, India yimten nung ano temelenshi ka aru tenzüker asütsüa akok. India nüchiso ngur külen Congress teloki dang ayongayonga, khi khi kum ishishi tangar yimten teloki yimsü asüba dak alaka, India lima ajak amokbanga yimsü süa aruogo. Iba mapangbo asenok Nagaland nung balaka Naga nung ajak Congress telok nung dener tesa akümbato yashi atalokba otsütem lir. Aji oda, para par mapang ka temer tang kum ter shi BJP teloki yimsüsüa aruba mapang lir. Atangji, kum aika pei linük aser nübertem asoshi tajung inyaker saka yimten tashi magitetter ta arur, tang kum ishika Narendra Modi leniba nung BJP teloki India lima nung yimsü asüdang alimai India tajungba metettsüsa mapa tajung inyakba angur. Ajisüaka, ajak asoshi tia majung kaji, BJP teloki India lima ya nisungtem sobaliba aser tamangba yimsü ajak sademsadema benshia litetba linük tajung kata ta amadoker, India lima ya Hindu lima ama bilema inyakba mapa ya asütsü. Ashi, BJP telokia Congress teloki angatetba aser linük temzüng kuma latetba nukjidong aser inyakyim nung aliba ama, India lima ya tamangba yimsü aser sobaliba tapu ajak sadema amanga benshitetba linük ka kumdaktsütsü merang asübo, ashiko taoba mapang Congress teloki kümsa kum yimsüsüa aru ama, BJP telokia yimsü sütetla. Joko, tangbo India nung nübertemi yimten yimsüsürtemi kati ka aitsütepa jembiba tesempa o nung mamanger aser tamangba yimsü kati ka anemdaktsütsü aser sempadaktsütsüsa yimten lenirtemi inyakbaji tamangba yimsü angatetba agi masü saka yimten nung pei jenjang ka alangtettsü asoshi jembir ta angatetogo. Aji oda, tamangba yimsü indangbo jembir aser ochimashi inyakba mapa nung tangarbo aitsür saka pei tashimait aser temenenang tuluba ta nübertemi yimten lenirtem dak repringtetadokogo. Iba jagi tang Karnataka state nunga election mapang BJP telok anema jembibaji government nung ochimashi 'Commission' agiba aser tesempatep o jembiba onüktem liasü. Atangji, India yimten ya Hindu aser Muslim na tsüngda meputep adokdaksütsü merangba lima ka masü mesüra Khristan purtem mali kumdaktsütsü meranga amokmerena reshikangshitsüba lima ka masü, kechiyong India yimten nüchiso jenjang ngutetba nung Hindu, Muslim aser Khristan purtem ajak pei pei shilem lir. Aji oda, tang Karnataka nung Congress teloki takok anguba shilem tulubalenkabo Congress ajungba agi masü saka BJP majungba agi angu asütsü. Ano, India asoshi tia majung kaji Congress mesüra BJP shimtsüba dang, kechiyong tangar yimten teloktem rongnungibo linük ajunga madak yimten lenisüba agütsütettsüsa tang tashibo matur. Anungji, Congress khi, BJP khi ta melenteptsüba dak alaka tanga temelentsü maka timtemba mapng lir. Iba ama tensa ka nung ano Congress telok meyipa arutsü amai Karnataka takok jagi teimla sayur. Atangji, India nung koba yimten teloki yimsü südir sang, iba yimsüsüba kübok kasa chiyongba langbang ka nung külemi Muslim nungba nashi shi den, Khristan nungba ak shi den aser Hindu nungba süngolemba den pelatetba chiyonga mentetba India lima ka asütsü tim. Kasaji, Mahatma Gandhi-i ashiba ama Hindu nungbajia Hindu yimsü amanger tajung ka, Muslim nungbajia Muslim yimsü junga amanger ka aser Khristan nungbajia Khristan tajung ka ta ser külemi putepputepa litetba limajiang shitakba India lima asütsü

OLEMSABANG

NAGA NUNGER YASHI, TANÜ ASER ASÜNG INDANG

~ B. Wati Jamir Arkong Ward, Mokokchung.

Yashi lima (taoba mapang) nung Naga nung taküm libaliruba indang kodang bilemdangdir kanga tang tesüngmangtsü lia aruba takümtem lir. Pei lima yimtsüng ajak nung tetsübuttsü agi sünger, amang-sangwa mali yimdak yimtsüng nung mitkar (duty) yur lia aruba, alu talen ajak külemi dang tasena jajaba putu mapang yamaji süidaktsü. Aji oda anüngdang yimdak tetsür-tanur tiptema amongtsü atema tsütemmonger (duty) teperi yurtsür pei yim nüka aruba tia, itemji asen dak tanü mekongshir, saka tantsür-tamburtemi jembia shia aruba, temulungjang animesüngzük den pei aki-alu mapa den pei kibong sensak tia nung aliba toktsür pei yimden yimli koda wazüka ayutsü, nübur koda tiptema (süngjema) toktsütsü, ibaji dang bilema tongtibangsa tepurtem amangsangwa maka mitkar maparen tang inyaka aru. Parnoki yimden yimli maparen inyakdang pei agitsü rongsen mebenden, saka ochishia pei tata shilem kechi inyaktsü lemsüktsü ibaji ochishia inyaka aru. Tetezü sübokrem aser ali rongsen tsütsü tenük meyok, parnok indang taküm libaliruji repringdangra aser bilemdangra yimden yimli maparen nung temulung tuluba agüja temzüng-jizüng koma lir, iba dak ajemdaker/rangloker lia aru. Parnok jakdang kechi arudir aruaka parnok tamzüng ozüng dak rangloker lia aru. Tetezü kechi jembir aji inyak, kechi inyak aji jembia aru. Iba yongji parnok indang yimden yimlijia kanga tasüngtet den lirtatsüka yimsü süa aruba tanü tashi tangar kintemi jembia arur. Aji angashidang tanü asenok tangar tsüngdang tejak tenteter. Parnok mapang yimsüsüba inyakyimji kodang repringdangdir/bilemdangdir kanga tang shisa taka, yimsüsübaji lomuden inyakyim (democratic norms) tetezü kin kidong shia nungi lenir yimsüsür kaka shimbaji kidong purtemi shiba temsüa ali aji shimteta lokti-i mulungba dang shima aru. Aser yamaji pai/lai tajungtiba agi nübur ajakji ochishia tenzüka aru, parnok tangatetbaji yamai liasü. Lenir ka shimbaji maongka/temoatsü masü saka iba ya khuret ta angateta (leadership is not a privileged but it is a responsible) tali ajemalua yimsü süa aru.

Tsürabur mapang tekolak bushiba (Mangku-bushiba) maparen ya kanga dang tongtibang aser nungtogo maparen ka liasü. Arr (tsükchir) mangku bener arutet nung tang paji sübu abensar ta pei tashika mapang mangku kwi bener aru ta asübaji kanga tongtibang den nungtoko liasü. Aji oda item bendentsü asoshi arrsüi aodang tia makarbo tsükchiri tekolak lepzüka bener ao. Yamaji yimdak yimtsüng nung mulung animesüngzük lia anogo mapang (pei pusu yimsüsüba) süidaktsü. Tia maka yim tilabo mapangshia tsükchiri arua yim makdok, mangku aikasa lepzüka bener ao.

Ano külen chiyongtsü peria maliyongji aser merükmeju maliyongji wara-shira tashidak tapu balala agi nisung sümar ta lia aru. Aji oda süaka parnok parnok yimden yimli den pei libajen/ayak (identity) tangar nem rakzüka moudaktsü aser pei libajenji akang-akanga wazüka ayu. Aji oda parnok ochi puküm aser ochi-o ji wazüka ayuba ajanga tanü asenok iba maongka/temoatsü nungji alir. Aji oda putusa putu timtem jenti ajangshia arudang 1872 nung asen Naga limai tongtipangsa asen Ao limai mezüng American Baptist Missionary ajanga iba Khrista yimsü ya bener arutsü, ibayongji Naga nung ajak mangku alepba anenadak aser Khrista yimsü tanem tanemi agizükyonga aru. Aji oda süaka Naga lima ya tangar shinga kübok meli pei sasa yimsü süa aruba mapang British sorkar den Indian Army ajanga artsü dak sendakba den India nung British kübok aliba mapang nungi Naga limaji India kübok ayutsü atema Naga nung okrongdakja aruba tanü tashi lir. India tasaji (policy) Naga limaji yimden-yimli dang masü ano tamangba yimsüjia Hindu/Hindutva yimsü leni meyipdaktsütsü nukjidong yur Naga nungertem merenshia reshikangshia aruba tanü tashi lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Frontline Ministries ajanga Kupza Baptist Arogo nung Women Ministry asoshi Mother Heart Skool May 11 nungi May 14 tashi ayongzüka katsüogo. Ajak agi tetsütem 62 graduate süogo. Iba sentong nung program Director Rev.Dr. Toshi Langu aser shisalen sayur Wt. Limala Pongen aser Technical Assistant Wb. Moanochet liasü.

Kenya linük nung lumia sarasademdang asürtem 201 jungogo

May 14, 2023: Tawa Kenya linük nung Arogo lenir kati alima tatembang matongdang kodaki aotsü atema nenoki pei chirnurtem anisemer lumia sarasademang, ta ayongzüka sülen nisung aika süogo.

Honibarnüa (May 13) Kenya nung ketdangsertemi Shakahola arem nung tasü mang 22 nguogo, ta regional ketdangser kati metetdaksü.

Tang tashi nung asürtem ajak senteperbo 201 jungogo.

Shakahola arem nung osangbenertem den jembidang regional commissioner, Rhodah Onyancha-i, "Tanü onok Forensic team-i tasü mang 22 ali nungi tutetogo ajisüaka onoki akümlir kümzükba osangbo mali," ta metetdaksü.

Laisa, onoki ano temelung melemteti aibelener ka puogo aser ibaji densemabo tang tashi nung nisung 26 pua lir, ta metetdaksü.

Taoba hopta piyong ketdangsertemi iba arem nungji samaba nisungtem bushiba den külemi tasü mang ali nung rema aliba bushir, kechiyong nisung noklang aika samaogo.

Hokolbarnüa tasü mang 29 ali nungi tutet aser tanur 12 tasü mangbo ongken ka nung dang aremba liasü, ta ketdangsertemi metetdaksü.

Good News International Church nung lenir (tongti aibelener), Paul Mackenzie-i bail nung chioktsü temepishiba agüja liasü saka Bodhbarnü (May 10) Kenya nung aliba court kati bail temepishibaji magizük.

Paul-i Arogo züngsemtem dang alima tatembang matongdang kodaki aotsü atema pei chirnurtem anisemer lumia sarasademtsü ajungshia liasü.

Kenya linük nung lumia

sarasademdang nisung aika asüba ken o dak sendakba nungsa taoba ita Pastor, Ezekiel Odero-a pua liasü.

Mavueni jila nung Pastor Odero indang New Life Prayer Centre aser Tenla kidang nisung aika aliba ketdangsertemi kümzüka liasü.

"Odero-i pa sülen anidakertem aika tepsetba atema pa anema ken o benoktsü. Odero indang Prayer

Centre nung nisung aika asüba osang morgues aser institution balalai metetdaksüba sülen pa apu," ta Onyancha-i metetdakja liasü.

Mavueni jila ya Shakahola arem nungi kilometer 66 shi pilar lir. Paul-isa April 15 nü alima tembangtsü, ta shinzüka liasü. Kenyan Red Cross-i linük nung nisung 600 dak tema samar mangur, ta metetdaksüogo.

Manipur nung Catholic, Evangelical aser Baptist Tenla ki 120 raksatsü

May 14, 2023: Tawa Manipur state nung rara adokdang Khristantem tekülem ki 120 dak tema raksatsüogo mesüra rongdoktsüogo aser item tekülem kitemji Evangelical, Baptist, Roman Catholic aser Presbyterian Arogotem indang liasü.

May 3 nungi tenzüka Manipur nung raraba mapang Tenka ki aika raksatsüogo. Tenla kitem

aser ki raksatsüba nokdangtsü atema police-i tear gas aser rubber injang amshia liasü.

Rara agi tamajungtiba kongshiba yimtiji state yimtiba, Imphal liasü.

Churachandpur District Christian Goodwill Council-i state nung Evangelical Churches Association aser Evangelical Baptist Convention indang Tenla ki 17 rongdoktsüba document

ka ajanga metetdaksü.

Independent Church of India indang Tenla ki 8 aser Evangelical Free Church of India indang Tenla ki 9 rongdoktsü. Presbyterian Tenla ki 52 rongdoktsü mesüra raksatsü.

Roman Catholic Tenla ki asem rongdoktsü. Iba dak alia Assembly of God Arogo aser New Testament Baptist Churches' Association indang Tenla kitem-a aika

rongdoktsüogo.

State nung rara adokba ajanga nisung 36,000 dak tema jenshiogo, ta Manipur Chief Minister, N Biren Singh-i metetdaksü.

State Education minister, Thounaoj Basanta Kumar-i, iba rara nung nisung 68 süogo ta metetdaksü ajisüaka state nung Christian organisations-ibo asürtemji iba dang nungjagi kanga agia teimba lir, ta metetdaksü.

Vatican nung Pope Francis-i Ukraine Tir, Volodymyr Zelensky ajuru



May 13, 2023 nü Pope Francis aser Ukraine Tir, Volodymyr Zelensky na senden amendang tangokba noksa nung angur.

May 14, 2023: Honibarnü Vatican nung Ukraine Tir, Volodymyr Zelensky-i Pope Francis ajurua senden menogo; senden nungji Zelensky-i Pope dang pai yimjung atema yangluba sentong pusemdaktsüner, ta mepishi.

Yaküm February 24 nü Russia-i Ukraine amak

tenzüka sülen Pope-i iba rara anentsü atema yaritsü melunga lir, ta jembia liasü.

Senden tenzüka Pope-i Zelensky dang, "Nai semdangba atema pelar" ta ashi.

Tena minute 40 shi senden amenba sülen Zelensky-i twitter ajanga, Pope Francis-i Ukraine nungger million aika atema

tebilemstsü katsüba atema pelaba lemsatop. Senden nungji pai Pope dang Ukraine nungger tanur meyirjang aika linük toktsür jena aoba metetdakja tanurtemji kidangi meyipa arutsü atema inyaksü mepishi.

Taoba ita Ukraine Ato kilonser, Denys Shmyhal-ia Pope dang tanurtem Russia

nungi Ukraine-i meyipa anir arutsü atema yaridaktsüner, ta mepishia liasü.

Zelensky-i, "Pope-i maneni sarasademtsütsü ta shiogo," ta metetdaksü.

Vatican-i sangdong ka ajanga, "Tenapronglai temeim mapa maneni inyaksü bangjemogo. Talisa Pope-i iba rara nung tai maket takoksa angurtem aser tashimaitertem kanga rongdak süa yaritsü nungdak ta shiogo," ta metetdaksü.

Zelensky-i Pope dang, Ukraine nung ozüing alema inyakba mapatem aitsütsüla, kechiyong takoksa angurtem aser yimmakertem tsüngda kasa temeden mali, ta ashi.

Paisa Pope dang Ukraine nungger yimjung sentong nung shilem agia adentsü mepishi.

ANO GO ABEN TSÜNGREM DEN

Ajenlokba temoatsütem

Kari ashir tebilemtetbaji teret teraksa leper lir. Kari ashir tebilemtetbaji tain, tila-tanur sayudak, tanurtem asayaba oset teraksa amshiba lir. Tebilemtetbaji tekolok kakat nung aser rongsen rizüngdak lir. Nisung mulungsentsü yariba bushir. Rollo Mays i ashir, "Tebilemtetbaji tesüiba mapa ajenloka ayuba dang masü; ibai tetezü aketba asenok teimla taroktiba aser tetsübu anüker lir."

Tetsübuji teshimtet lir. Aiben Tsüngremi asenok asoshi inyakba asenoki amatoker. Charles Spurgeon ashir, "Asenoki asen temoatsütem liasem nung zülur, aser asenok mulung masü marble nung zülur." Tebilemtetbaji temulungjang nung atsüngba khuret ka akümer. Bilemtetba o ji Tazüngkunem kakat nung 14 ben tashi amshia lir, aser 9 benbo mamadeoktsü tekümdangtsü ashiba alitsü. Ochiba tenüngsangji temulungjang nungi adoktsüla, bilemtetba nungi masü (Matt. 15:8). Tekülemji Tsüngremi ashiba aser inyakba ajak tamangertemi tushia agizükba lir.

Tsüngremer temoatsütem ne mulung nung ajenlokang, aser Pa tenüng asangba nung na kodanga ania makümtsü.

Kodanga Tsüngremer temoatsütem tamadok. Pai inyakba ajak asoshi Pa tenüng sangang. Tesüiba khurettem agi ne mulungjang sünga tüyutsü saka Pa temoatsü bilemtetba agi aji teperiba kümdakjang.

AO OSHI ANGAZÜKDAK:
TANÜ ANGAZÜKTSÜBA OJANG



Pusem

(n) tapu asem külemi, tebu, techir aser tenela temeshi (trinity)

* Khristan-temi pusem nung amanger.

Pusem

(v) yariseмба (forward)

* Kü tesayuri ni atema **pusem** o ka shitsü.

OLONG PAITEP # 6515

1				2				3		4
5		6								
							7			
8										
										9
			10					11		
						12			13	
14										
16										

TIPIEN

- 2. Auo nung chiyongsü asenba
- 5. Mangyimba mapang
- 7. O tamendakdak
- 8. Pei dak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüung
- 3. Tenarong maten
- 4. A _ _ _ g
- 6. Mopung apodoka
- 9. Tongtipang tagitsü
- 10. Menungra bilem
- 11. Aiür
- 13. S _ _ _ k
- 14. T _ _ _ r

OLONG PAITEP # 6514 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.



Agüja aliba noksa nung meputepi aliba 5 bushiang

Tanur asoba anogo nung salem osang den noksa angati adokdaksünüra - Tenüung, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

- 1. Tenüung
- 2. Tasoba anogo
- 3. Küm
- 4. Class
- 5. School
- 6. Talidak
- 7. Salem osang

Tepela Tasoba Anogo



Kiren Rijju-i Deepak Nabam Living Home yaritsü nangzük



Itanagar nung Union Law & Justice Minister Kiren Rijju-i Deepak Nabam Living Home nem ambulance ka agütsü dang agiba noksa angur.

Itanagar, May 14, 2023

(Agencies): Union Law & Justice Minister Kiren Rijju-i Itanagar nung aliba Deepak Nabam Living Home nem ambulance ka agütsü aser ano senotsü teyari agütsütsü nangzükogo.

Iba Home nung talidak makartem anioka lidaktsür aser mental health motivational function cum ambulance flag-off sentong nung Rijju-i senotsü teyari agütsütsü nangzükua liasü.

India Tatong Tir M Venkaiah Naidu-i Arunachal Pradesh nung NGO Deepak Nabam Living Home nem 'Vayoshreshtha Samman in 2021' agütsüogo.

Union Social Justice & Empowerment Ministry kübok iba NGO nem 'Best institution

for providing services to senior citizens and awareness generation' telemsa atema sempet agütsü.

Deepak Nabam den pa kinungtsü Protima nati tesüiba küm 17 tashi iba NGO ketdangsüa arur, aser tenati sorkar sen mesüra tanga teyari kecha magir. Deepak Nabam Living Home nung tang nisung 300 tema lir.

Taoba mapang CM Pema Khandu-ia iba Home semdanga liasü aser idangji pai mapa tajung inyakba ngua pa indang personal account nungi Rs 50 lakhs teyari agütsü.

Union Law Minister Kiren Rijju-i yashi iba destitute home

semdang aser infrastructure tajungba kümdaktsütsü atema senotsü teyari agütsütsü

nangzük.

Deepak Nabam Living Home nung common kitchen, male ward, flood protection, security fencing, drainage amala yanglutsü atema pai sen teyari agütsütsü.

State sorkari item amala NGOs nem Corpus Fund masü saka grant-in-aid agütsütsü. Bank temi sen tetemlok tera keter Corpus Funds agütsüba ajanga NGO temi tajangzükua balaka mangur, ta Rijju-i ashi.

Deepak Nabam Living Home ya 2015 küm lapok aser tang tashi nung nisung 1800 nem teyari agütsüogo.

Kiren Rijju-i Deepak Nabam, pa kinungtsü aser volunteers ajak dang bendanga agüja tenzükba atema tenüngsang agütsü.

Tripura kaketshirtemi 'Love Jihad' atema kümdangtsüla: CM Saha

Agartala, May 13, 2023

(Agencies): Director Sudipta Sen-i "The Kerala Story" nung Kerala state dang masü saka India ajunga indang chichiba noksa sayutsü merangogo ta Tripura Chief Minister Prof Dr Manik Saha-ia ashi.

Linük ajak den külemi Tripura nung kaketshirtemia iba film reprangtsüla aser 'Love Jihad' atema kümdanga alitsüla ta pai ashi.

Honibarnü Rupashi Multiplex nung Chief Minister Saha den state cabinet, MLA tem aser Bharatiya Janata Party ketdangpurtemi "The Kerala

Story" reprangba sülen pai iba osang metetdaktsü.

Tang tashi nung asenoki 'Love Jihad' olung dang angashia lir, ajisüaka kiralongrartemi iba 'Love Jihad' amshia tetsürtem anioktsü tasa atonga inyaker aser ibaji iba film ajanga sayur. Asenoki mengui angatetsüba ya kanga tasak ta CM Saha-isa ashi.

"Prime Minister Narendra Modi-i linük ka akümtsü atema inyaker. Nisung aikati kechiba linük longjemtsüla ta asüba mangateter. Asenoki Love Jihad meteta alitsü tim. Nisung aikati kanga dang shisa makai iba film aitsür" ta paisa ashi.

"West Bengal sorkar ya tarutsü anogotem Bengal otsü asütsü. Iba film ya West Bengal nungbo noktangtsü, saka iba nung tajangzük kecha malitsü kechiyong nüboritemi iba film reprangtsüsa" ta Chief Minister Saha-isa ashi.

Chief Minister Saha den külemi Minister Ratan Lal Nath, Minister Pranajit Singha Roy, Minister Sushanta Chowdhury, Minister Tinku Roy, Minister Sudhangshu Das, Agartala Municipal Corporation Mayor Dipak Majumdar, MLA Ratan Chakraborty aser tanga MLA temi iba film repranga liasü.

Arunachal ghonda 72 mokdang dang nisung 10 apu

Itanagar, May 14, 2023

(Agencies): Arunachal Pradesh nung ghonda 72 mokdangba mapang tensa raksaba aser public kiojentem raksatsüba atema police-i nisung 10 puogo.

Arunachal Pradesh Police-i ken o 12 benok aser nisung 40 tashi jangjatetogo.

Arunachal Pradesh Unlawful Activities (Prevention) Act (APUAPA), 2014 kübok nisung 41 dak tai tongloksüogo, ta police ketdangsür kati ashi.

"Anogo asemnü mokdangba mapang Arunachal Pradesh kübok tesem balala nung nisung 120 jungnüa apu. Ajisüaka counselling mesüra 'good behaviour' nung sign asüba mesüra security bond sülen parnok chiok" ta APP PRO Rohit Rajbir Singh-ia ashi.

Mokdang ayongzüktsü atema senotsü bendenertem aputsü bushitepar ta pai ashi.

Senotsü bendenertem merenshitsü aser ano tanabuba bushisüng dang

shilem nung senotsü arulen kuli bushitsü, ta paisa shisem.

"Iba mokdang atema senotsü saruba osang onoki angazükogo. Iba atema onoki bank details aser monetary transactions kulitem bendener" ta PRO Rohit-isa ashi.

Nari Shakti aser Pro Dam ajanga May 10 nungi May 12 tashi ghonda 72 mokdangtsü ayonga liasü.

APPSC paper temai adokba ken o atema sorkari takhangba onük 13 langzüang ta shia parnoki lungkak ait.

Cyclone Mocha: Bangladesh aser Myanmar tzükum tongogo

Dhaka, Monupii/May 14 (Agencies): Tashi tait cyclone ka category-5 yipru den sako kumer Bangladesh aser Myanmar tsükumlen konshir.

Cyclone Mocha yagi tzunglu kanga tesashi bener arutsür aser mopung ghonda ka nung kilometre 195 tashi kera aoner, koba ajanga Bay of Bengal temeket ali nung tüzümsüng tulu adoktsü akok.

Yipru yagi tüzüsem metre pezü tashi muteta adokdaksütsü aser tenemok nung aliba yimtsüngtem mubangtsü akok.

Iba yipru yagi alima nung refugee camp tulutiba, Cox's Bazar nunga kongshitsü tsüboteper, kong nisung million ka jungnüa alir.

Tzüngsang-mopung takzür temi Cyclone Mocha ya Bangladesh nung küm 20 jungnüa nung yipru tesashitiba asütsü, ta tekum dangtsü shia lir. Nisung 500,000 shi lendong majurutsüla tesemtemi anir ogo.

Iba region nung tzunglu sashia aruba aser mopung

aonba agi kongshiogo aser Myanmar nung Sittwe yimti nung nikongdang 1:00 ako meta nungi tenzük.

Sittwe tesem timba nung electricity aser wi-fi connection nung timtem adoka lir, kong repranga lia tüzüsem tulu adoka tüzü agi metsüngbanga aliba yimtung nung jana nungloktsüba video nguogo.

Sittwe nung tekumzükur temi ashiba agi, tüzümsüng agi taolen mali alirtem nungi teyari meshia ajar saka tang parnok yaritsü lendong tulu lir.

Cyclone tonga arudang mopung sashia aonba ajanga telecom tower ka laodaktsü. Yangon nung kilem shizükur aoba aser billboard tem ki temalen yimzüba video tem social media nung nguogo.

Mrauk U yimti nungi noksa prokshiba nung palm süngtong tem mopung agi ali tonga azür aluba, yinjong agi yangluba kilem yimtung leni shizükur aoba aser nisung kar yipru nungi atsükshiba nguogo.

Myanmar kübok Rakhine

State nung süngdong ka laoa arishi küm 14 tain tebur ka süogo, ta osang ajanga ashir aser ano Myanmar tesem balala nung ki o jen raksaba osangtem lir.

Bangladesh nunga mopung tesashi aon tenzükogo aser iba den tzunglu sashia arur. Cox's Bazar nung yimtung azünga kumogo, süngdong tem onzür aser anüng manga akumer.

Coz's Bazar nung school aser monastery tem nung nisung sünga jenoka lir.

B a n g l a d e s h i meteorological department office ajanga ashiba agi, cyclone tiyong nung telongzük kilometre 75 shi nung mopung ya ghonda ka nung kilometre 195 tashi aoner.

Cyclone ya ano tzükum tonga maru saka nikongdang 3:00 ako meta atongtsü imlar aser iba cyclone telongzük kilometre 520 shi lir, anungji linük ajanga aotsü mapang tatsükabo agitsü, ta Dhaka nung meteorologist Dr MM Malik-i ashi.

Imran Khan-i Pakistan tesem ajungalen longkak aittsü ayongzük

Lahore, Monupii/May 14 (Agencies): Mongulbarnü Pakistan indang taoba ato kilonser Imran Khan apuba sülen pai linük tesem ajungalen "freedom" protests alitsü ayongzüküa liasü.

"Nüchi jenjang ya melamela mangur. Nai ibaji ajepzüksüla. Nai iba atema bendanga agütsütsüla," ta arishi küm 70 tain Khan-i ashiba Honibar aonung YouTube nung sayua liasü. Supreme Court tetsüngtai aita pa pua aliba nungi chioker anogo ka lir pai iba o ya jembia liasü.

Deobar nikongdang 5:30 ako nungi tenzüküa ghonda ka yimtung aser yimtsüng tem nung longkak aittsü pai ayongzüküa liasü.

Taoba küm April ita yimsüsüba menden nungi atsüngdokba sülen Khan anema ken o aika benoka lir aser ochimashi ken o ka nung pa apuba ya ozüng alema lir ta linük nung tematiba court ajanga sangdongba sülen Hokulbarnü bail nung chioka liasü. Khan'er Pakistan Tehreek-e-Insaf (PTI) party lenir aika tang tashi pua yua lir.

Khan apuba ajanga linük anokshitsü aser yimti-yimtung nung longkak ait tenzük, aser pa bukumer temi pa ya tashiyim amshia pua bener aoba lir ta aitsür. Pa chioksü takhangba agüja pa bukumer temi lenmang mokdang aser mitkartem indang ki o jen raksatsür, shirnoki Khan apu ta aitsür.

Anogo ishika rongrongshirong aser mepetmesü adoka arur Deobarnep süngjema liasü. Khan-i tangsa election agitsü

akhangba nungi masetshir. Pa ya linük nung nungtugutiba lenir ka kumogo aser pa ato kilonser menden nungi atsüngdokba sülen linük nung election agitsü takhangba agüja rally aika agia arur.

Taoba küm rally tuluka nung Khan tepsettsü merangba nungi jenbu aser iba atema pai linük nung tashi tulu aliba army tenüng asener.

"Army tekolakba inyakyim agi asen mitkar mejungi kumdaktsü. Ibai kü mechi masü pa mechi lir," ta Khan-i Lahore nung par kidang nungi ashi. Hokulbarnü pai osangbener dang, pa apuba ya nisung ka mapa lir aser ibaji army tekolakba lir, ta shia liasü.

1947 küm linük kumtetba sülen Pakistan nung mitkar temi tashiyim amshia asem ben sorkar atsüngdoka lir. Parnoki küm 30 dak tema linük nung yimsü süa aru aser iba linük yimtenren nung shilem tulu agir.

Mitkar temi linük nung rongsenketzung mesüra yimtenren tsütsü tensa majungba tenüng amer teka amoshia arur. Yamaji lia ano ita aika mepetmesü adoka arudang mitkar temi ano teka amoshitsü südi ta tsüboa liasü, saka parnok democracy inyakyim nung dena lir ta shia liasü.

"Army indang lenirtem, chief of army staff temi democracy nung temolung alemer. Mitkar tashi amshitsü tebilemba mali," ta mitkar indang odongtar Major-General Ahmed Sharif Chaudhry-i osangbener dang Honibarnü shia liasü.

Longkak aitba mapang

mitkar alidak amakba ken o nungi Khan-i shilem magi ta ashir aser par party worker tema maden ta ashir aser bushisüngdangtsü ayongzük.

Khan-i tai tongloktsüba army temi magizükur aser Honibarnü parnok anema mashi angatetdaktsüba nungi pila alitsü ashi.

Taoba hopta rongrongshirong adokba nung nisung toku asü, ta police aser mozüki ketdangtsü temi ashir. Tang tashi sorkari nungi asü-amaba osang sangdonga mali.

Police noklang aika yiru aser nisung 4,000 dak tema apu aser itemji timba Punjab aser Khyber Pakhtunkhwa province tem nungi lir, ta ketdangtsü temi ashir.

Longkak ait tenzükur taoba foreign minister densema PTI lenir 10 shi pua lir, ta Khan'er okatsür temi ashir.

R o n g r o n g s h i r o n g adokdaksüba, ajungmesoba aser anishirba nung shilem agia alirtem ghonda 72 tsüngta aputsü, ta Ato Kilonser Shehbaz Sharif-i Honibarnü shia liasü.

Facebook, YouTube aser Twitter ama social media sapang tongtipang tem mamshiteter. Ministry of Interior ajanga Pakistan Telecommunication Authority dang linük tesem ajunga nung mobile internet services shibangtsü aser item social media network asem mamshitetsüsa kumtsütsü Mongulbar aonung totuyuba agüja liasü.

Honibarnü linük tesem kar nung mobile data service amshiteter.

Arishi Küm 81 Ajungba Tepela



Mrs. Senkila Jamir
15:05:1942 - 15:05:2023

Late Mr. I. Imsü Imsong kinungtsü Mrs. Senkila Jamir (Yaongyimsen) arishi küm 81 abensaa moatsüba atema Tsüngrem nem tenüngsang agütsür.

- Temeim Chirnur aser Semchirtem.

TENUNGSANG AGÜTSÜR

Union dangi konang nüngsang bener arutsüba asoshi Changtongya Senso Telongjem Dimapur (CSTD), Dimapur Changtongyatsür Telongjem (DCT) aser Changtongya Kaketshir Telongjem Dimapur (CKTD) ajanga tenüngsang agütsür:

- Mrs. Akumtenla Longkumer D/o Er. R. Takuyangba Rtd CE, NPWD ajanga Institute of Banking Personnel Selection (IBPS) Examination for Bank Probationary Officer (BPO) tatidang ajungketba.
- Shri. Imtisüngkum Lkr, Dept. of Land Resources Kohima, Nagaland nung Joint Director jenjangi ajungketba.

Neok takok tulu asoshi onok tejak tenteter. Tarutsü anogotem nunga neok takok aser temoatsü nung len aniang ta sarasademtsür.

Sd/- President CKTD	Sd/- President Dimapur Changtongyatsür Telongjem	Sd/- President CSTD
-----------------------------------------	----------------------------------------------------------------------	-----------------------------------------

ALI TAYOKTSÜ LIR

Two Half pura per sq.ft. Rs. 25, From Commanding Junction
5 Minutes. Slightly negotiable
Contact : 986326159

Germany-i Ukraine nem sen billion \$3 alang teyari agütsütsü

Berlin, Monupii/May 14 (Agencies): Germany-i Ukraine nem USD billion 3 shi alang military teyari talila agütsütsü, kong tank, anti-aircraft system aser injang densema lir, ta Ukraine tir Volodymyr Zelenskyy Berlin-i maru tsüngda sorkari sangdonga liasü.

German Defence Minister Boris Pistorius-i Honibarnü ashiba agi, Berlin-i tang euro billion 2.7 alang teyari agütsütsü nangzükba ajanga, Ukraine yaritsü atema Germany-i süoki ia bilemba sayuner.

"Germany-i mapang kobika südir süaka takokba tashi teyari agütsütsü," ta pai ashi.

Kyiv nem mezüngbo teyari meyilongi dang agüja liasü saka Germany ya Ukraine nem prangbong aser hadir balala agütsürtem rongnung tongtiba ka kumogo. Parnoki kanga dang tongtibang Leopard 1 aser 2 model tank tem agütsütsü asoshi temelaba agütsü aser iba den drone aser missile amshia amakba nokdangtsü atema anti-aircraft system agütsüogo.

Tang military teyari agütsütsü asoshi telemtetba agiba ya German weekly Der Spiegel-i sangdonga liasü, kong Leopard 1 A5 tanks 30, Marder armoured personnel carriers 20, combat vehicles 100 dak tema, self-propelled Howitzers 18, reconnaissance drones 200, IRIS-T SLM anti-aircraft

systems pezü aser tanga air defence equipment tem densema lir.

Anütoklen aliba Bakhmut yimti anasa Russia nunger sepaitemi atsünger aliba tesem aika Ukraine nunger sepaitemi meyipa agiogo ta Ukrainian military commander temi ashiba mapang ka nung Germany-i teyari agütsür. Bakhmut temeket ya Russia aser Ukraine na rara dak teyongtsü lir aser ita aika iba tesem nung sepaitem tsüngda kanga sashia rara arudar.

Zelenskyy-i pa Germany-i tonga aoba osang Deobarnü anepdang tweet ka ajanga sangdonga liasü. Russia-i par linük amak tenzükba sülen pai tang mezüngbuba Germany semdang.

"Berlin nung lir," ta Zelenskyy-i tweet asü. "Weapons. Powerful package. Air defense. Reconstruction. EU. NATO. Security."

Zelenskyy-i, Italy nunger lenirtem aser Pope Francis den Italy nung Honibarnü ajurutebpa sülen pa Berlin-i ao. German Luftwaffe jet-i Zelenskyy Rome nungi Germany yimtibai anir ao.

Ukraine nunger lenir ya Italy Ato Kilonser Giorgia Meloni den ajurutebpa sülen Vatican nung arishi küm 86 tain Pope Francis den minute 40 shi mapang intoka liasü.

(Maneni tapak 8 nung...)

Carlos Alcaraz maneni No. 1 asaya akümtsü



Monupii/May 14, 2023 (Agencies): Honibarnü Italian Open mezüngbuba round nung Albert Ramos-Vinolas 6-4, 6-1 agi akokba sülen Carlos Alcaraz world No. 1 asayar akümtsü jangjaogo.

May 22 nü ranking sayaba mapang Alcaraz-i temaba jenjang nung Novak Djokovic atsüngtoktsü aser pa French Open nung No. 1 seeding asayar asütsü, koba May 28 nü tenzüksü.

Asaya nung Alcaraz double-fault ka menaba sülen Ramos-Vinolas nem pa indang serve break südaksü ajisüaka pai

kara kara meyipa arur Vinolas indang serve break asü aser mezüngbuba set koka liasü.

Foro Italic nung tzunglu aruba ajanga conditions mejungi liaka Alcaraz-i Ramos-Vinolas dang nungi asemben agi tali winners (28-11) nguteta liasü.

Barcelona aser Madrid nung asayamung akokba sülen Alcaraz-i tang tashi nung asaya 12 nung khen danga tamakok mongui arudar aser clay asayamungtem nung pai asaya 20 koka lir.

Kasa asayamung tanabuba asaya nung sixth-seeded Andrey Rublev-i 6-3, 6-4 agi

Alex Molcan akok, J.J. Wolf-i 6-3, 6-4 agi Hubert Hurkacz akok aser Borna Coric-i Thiago Monteiro 4-6, 7-6 (8), 7-6 (5) agi kokogo.

Alcaraz taruba asaya Jiri Lehecka mesüra Hungary nung qualifier Fabian Marozsan den asayatsü.

Kasa mapang nung Djokovic-ia Hokolbarnü mezüngbuba asaya kokogo.

Kasa asayamung tetsür kija asaya nung Colombia tsür qualifier Camila Osorio-i fifth-seeded asayar Caroline Garcia 6-4, 6-4 agi akok, Anhelina Kalinina-i Sofia Kenin 6-4, 6-2 agi akok aser Wang Xiyu-i 6-2, 0-6, 7-5 agi Taylor Townsend tsükdakja liasü.

Tzunglu aruba ajanga Honibarnü asaya ghonda anashi agi menor tenzüksü aser Rublev aser Molcan na mezüngbuba set asayaba mapang mapang tatsüka atema tzunglu agi minpronga liasü. Iba sülen tatembangbuba point atema asayaba mapang tzunglu kanga sashia arua liasü ajisüaka Rublev-i kanga aritepa asaya tembangja liasü.

SAFF asayamung atema Pakistan football team India-i arutsü

New Delhi, Monupii/May 14 (Agencies): Taruba South Asian Football Federation Championships atema Pakistan Football team India-i arutsü, koba June 21 nungi July 4 tashi Bengaluru nung asayatsü.

Iba asayamung nung shilem agitsü atema Pakistan-i jangjatsüba sülen AIFF-i ashiba agi, kidanger linük iba asayamung nung shilem agitsü atema kecha tetsükdaksü mali.

Team ti asayatsü aliba asayamung nung Lebanon aser Kuwait natia shilem agiba angutsü.

SAFF executive committee-i iba asayamung tali tajungba kümdaksütsü asoshi March ita south Asian region tema nungi team ana anioktsü asoshi telemtetba agia liasü.

"SAFF Championships nung Pakistan nungi asayatem India-i arua asayaba nung kecha tebilemali," ta Indian Football Federation secretary general Shaji Prabhakaran-i PTI dang ashi.

Linük ana tsünga yimden yimsüsüba dak sendakba nung Pakistan nung asayatem nem visa agütsüba nung kecha tetsükdaksü adoktsü madoktsü ta asüngdangba mapang pai, "Indian bridge team-a tawa Pakistan nung regional asayamung ka nung shilem agiogo anungji parnoki shilem agitsüba dak sendakba nung kecha tetsükdaksü aliba merprangteter," ta ashi.

India dak alia iba asayamung nung Lebanon, Kuwait aser Pakistan den Nepal, Bhutan, Bangladesh aser Maldives-i shilem agitsü. FIFA-i tenokdangba agütsür aliba ajanga Sri Lanka iba asayamung nung shilem magitetsü aser kasa mapang nung Afghanistan-a küm ishika tejkadang Central Asian Football Federation nung adentsü atema SAFF toktsüogo.

1993 küm nungi tang tashi nung iba asaya 13 ben asaya lir aser Pakistan team asayamung ana nung shilem

magitetsü liasü.

Pakistan Football Federation-i 2015 küm India nung iba asayamung ayongzüka asayaba mapang team meyoctet kechiyong iba mapang linük nung mepetmesü kar adoker liasü. Iba sülen 2021 küma parnok masayatem kechiyong FIFA-i parnok nem tenokdangba agütsür liasü. Iba tenokdangba ya taoba küm aginogo.

Prabhakaran-isa, Kuwait aser Lebanon na densema asayamung nung shilem agitsü aliba linüktemi national team tajungtibatem yoktsü, ta ashi.

India-i otsüsütsü iba asayamung ya tiben koka lir. Defending champions Maldives-i iba asayamung anaben koka lir aser Afghanistan, Bangladesh aser Sri Lanka-i khen khen koka lir.

Iba asayamung ya India nung tang agi pezübenbuba ayongzüka asayatsü.

Iba asayamung atema draw Bodhbarnü asütsü.

Bordeaux atema wildcard agütsüba Nadal-i magizük

Paris, Monupii/May 14 (Agencies): Taruba hopta Bordeaux nung Challenger tournament atema wildcard agütsüba Rafael Nadal-i magizük.

Spain nung asayar ya yiruba ajanga French Open nung asayatsütsü masayatsütsü mejangjaba mapang ka nung tang wildcard agütsüba pai magizük, ta asayamung ayongertemi Deobarnü metetdaksü.

Nadal ya January ita

Australian Open asayaba mapang hip yiruba sülen tang tashi taneptsü junga monguteti lir aser pa iba hopta Italian Open nung masayatsü asoshi telemtetba agiba sülen Paris Grand Slam nunga shilem magitetsü akok ta shisabulua bilemer.

"Ni pa nem (Nadal indang agent Carlos Costa) nem wildcards ka agütsü. Pai Nadal Manacor nung maneni renemshidar aser pa ano renema mali aser French Open

nung shilem agitsü atema mapang den arishitepa tang kanga aritepa renemshiba mapang ka lir ta ashi," ta Jean-Baptiste Perlant French sports daily L'Equipe dang ashi.

Nadal taoba hopta Madrid Open nung shilem magi aser pa Indian Wells, Miami, Monte Carlo aser Barcelona nunga masayatsü liasü.

French Open koba Nadal-i taoba küm densema 14 ben koka lir iba asayamung ya May 28 nü nungi tenzüka asayatsü.

Sudirman Cup: India-i mezüngbuba asaya nung Chinese Taipei makok



Monupii/May 14, 2023 (Agencies): Deobarnü Sudirman Cup nung India asoshi mezüngbuba asaya nung PV Sindhu-i kanga meranga asaya ajisüaka parnoki Chinese Taipei mekoki liasü.

Iba asaya nung India nung asayatem merangdangba ka maliasü aser Tanisha Crasto aser K Sai Prateek nati tarep temeyoktep asaya kanga junga tenzüksü saka tatemlen belematok aser Yang Po-Hsuan o Hu Ling Fang na 21-18 24-26 6-21 agi mekoki liasü.

Tebur kija asaya nung World Number 9 asayar HS Prannoy-ia junga masayatem aser pa world no. 5 asayar Chou Tien Chen-i 19-21 15-21 agi koka parnok 2-0 agi tejkadang aküm.

Iba sülen tetsür kija asaya asaya aser India team asüngsashitsü atema Sindhu dak timla ayu. La taoba mapang world no. 1 asayar Tai Tzu Ying den asaya liasü.

Hyderabad nungi arishi küm 27 tain asayar shiba tawa junga masayatsü arudar, lai kanga meranga asayadang ajisüaka 21-14 18-21 21-17 agi Tai Tzu mekoki liasü. Tena tsünga ghonda ka ser minute pezü asaya liasü.

Iba asaya akokba sülen asaya pongu asayatsü aliba nung Chinese Taipei 3-0 agi tejkadang aküm.

Sindhu-i tatesa Tai Tzu ya 2019 küm world championships nung koka lir. Iba asaya densema lai Tai Tzu ya 18ben makoker asütsü.

Sindhu, shiba taküm Spain Masters nung tajungtiba asaya lir lai mezüngbuba asaya makokba sülen tanabuba aser tasembuba game nungbo kanga meranga asaya ajisüaka tera agi asaya mekotteti liasü.

Mezüngbuba asaya nung tena rongnung Tai Tzu-i kanga agi tajungba asaya ajisüaka tanabuba asaya nung Sindhu-i kanga junga asaya aser decider asayatsüsa aküm.

Germany-i Ukraine nem... (Tapak 7 nungi...)

"Ukraine nung nisung million aika timtem tekangshi nung aliba ngua pai süoki ia bilemba atema ni pa dang kanga pelar," ta pope den ajurutepeba sülen Zelenskyy-i Telegram nung zülutsü. Pai ashiba agi, parnoki tanur meyrejang aika tia indang sensaksemogo, shirnok Kyiv-i ashiba agi, Russia-i anirogo aser kasa mapang nung yimjung asoshi sentongtema sensaksemogo.

Vatican-i Russia metetshi-i, tena Ukraine nung tang rara adoker aliba ajanga humanitarian aser yimden yimsüsüba tsütsü tetsükdaksü adoker alibattem indang aser jenjang tamajung nung aliba nüburtem atema teyari agütsütsü nungdakba indang sensaksemogo.

Francis-i Ukraine nung yimjung atema aiben ayongzüka arudar aser pai teyongtsü ia inyaksü asoshi merangdangogo, ajisüaka tang tashi nung kecha takok ngua

mali aser pai iba rara adokdaksüba atema Russia dak tai metongloksüba asoshi pa aija arudar.

Zelenskyy aser Meloni na minute 70 tashi sensak asem aser iba mapang lai lar linük Moscow den tesendaktep tajung liaka Kyiv nem takokba tashi teyari agütsütsü nangzüka liasü. Iba sülen osangbenertem den sensaksemba mapang Zelenskyy-i, taküm kümsütsü asoshi teyari agütsüba atema Meloni dang kanga pelaba lemsatepa liasü.

Italy-ia Kyiv nem prangbong hadir balala bener yokogo, ajisüaka komala hadir agütsü iba indang osang magütsü. Meloni shibai February ita Kyiv semdanga liasü, lai Honibarnü ashiba agi, "Ukraine-i rara akoktsü aser taoba mapang dang nungi tashitaitba aser tali yimji yimjung nung nokdaksü ta ni tamang akar."

BILEMDANGANG
"Anogo shia mapang tajung inyaksü atema maongka bener arutsü."